

პისკოპოსი, მღვდელი და მრევლი საქართველოს ეკლესიაში და დღევანდელი საეკლესიო კრიზისი



დღეს არსებული საეკლესიო კრიზისის უმთავრესი მიზეზი არის არაკომპეტენტური, ფსევდოსულიერი და მეშხანიზმით შეპყრობილი ეპისკოპატი, რომელიც ძალაუფლების შენარჩუნების სურვილით აღძრული ყველანაირ მორალურ და სარწმუნოებრივ კომპრომისზე მიდის. მღვდლების დიდი ნაწილი უუფლებო მასად იქცნენ, მეუფე-ბატონების მონებად, მუხლებზე მოლოლიალე ხელის ბიჭებად და ან სულაც შპიონებად, მათგან ბევრი თავადაა ბიწიერი, შესაბამისად მორალური არჩევანის გაკეთება არ შეუძლათ, მეორე ნაწილი უფრო ზნეობრივნი და წესიერები, დამონებულ მდგომარეობაში არიან და ვერ ახერხებენ და ვერ ჰბედავენ თავისუფლად და თამამად გამოთქვან თავისი პოზიცია. მრევლი კი სრულიად უუფლებო, უუნარო მონათა მასად აქციეს, არადა იყო დრო და საუკუნეები, მრევლი ირჩევდა ეპისკოპოსს! მართალია, შემდგომ სამეფო ხელისუფლებების ფარული დაწოლით კრებებმა ეს უფლება მრევლს წაართვა, მაგრამ მრევლი რჩებოდა ეპისკოპატის მაკონტროლებლად და ეკლესიის მამოძრავებელ სინდის-ნამუსად!

მართალია ეკლესიაში ეპისკოპოსის ძალაუფლება ყოველთვის ძალიან დიდი იყო, მაგრამ ამავე დროს კანონიკური სამართლის და საეკლესიო დისციპლინის წყალობით იზღუდებოდნენ და კონტროლდებოდნენ ეპისკოპოსები. მაგალითად, ძველ ეკლესიაში თუ ეპისკოპოსი მძიმე ავადმყოფობის გარეშე ზედიზედ სამი კვირა წირვისა და ქადაგების გარეშე გაიყვანდა დროს, ხარისხიდან განიკვეთებოდა, დღეს თუ გინდა სამი წელი გადააბი, პასუხის გამცემი და მომკითხავი არავინაა, საეკლესიო კანონიკა და დისციპლინა სრულიად მორღვეულია. ერთადერთი დაუნერეული კანონი მოქმედებს

საქართველოს ეკლესიაში: “არ გააკრიტიკო საპატრიარქო და პატრიარქი”, დანარჩენი რაც გინდა აკეთე, უკანონო შვილებით დაწყებული სხვა ცოდვებით დასრულებული, ეკლესია ავაზაკთა ქვაბადაა ქცეული.

წითელ საბჭოურ მანქანაში გატარებული და გადამუშავებული საქართველოს ეკლესია ვეღარ ახერხებს მორალური მაგალითის ჩვენებას ერისადმი, სამაგიეროდ მასების ზომბირების, გონებრივი დაჩლუნგების და სულიერი დამონების საქმეში წარმატებულია. “ამინ”-ების და “დიდება უფალს” (არაბულად ეს იგივე “ალლაჰ აკბარ”-ია) უაზროდ მწერალი ბრძეული ვეღარაფეს აცნობიერეს, აღარ შერჩათ მორალური სტანდარტი, მზად არიან ყველანაირი უმსგავსობა “გაუპრავონ” თავის კერპ საპატრიარქოს, რომელიც ეკლესია ჰგონიათ და სინამდვილეში ეკლესიის ნომერ პირველ მტრად იქცა და ქრისტიანობას ფარისევლური, რიტუალური გარეგნული შინაარსი დაუტოვა მარტო, სული კი გამოაცალა. კაცმა რომ თქვას, საბჭოთა ათეისტური ხანიდან გამოსულმა ერის დიდმა ნაწილმა არც იცის და არც უნახავს, როგორი არის ნამდვილი ეკლესია და რა ევალება მას.

ქართულმა ეკლესიამ დაკარგა ცოდვისა და უღირსების მხილების ფუნქცია. ლგბტ თემს თუ დაატერორებენ, ეს ჰგონიათ მხილება და მორალის დაცვა, სამაგიეროდ ეკლესიის მმართველობა არასოდეს ამხელს ხელისუფლებათა და მდიდართა ამა ქვეყნისათა უღირსებას და ცოდვებს, არც წინა წლებში და არც ახლა. პატრიარქი მუდამ ზრუნავდა საკუთარი კომფორტისა და ძალაუფლების გამყარებაზე, მას არც შევარდნაძის, არც სააკაშვილის, არც არაფორმალური ივანიშვილის მმართველობის მრავალწლიან პერიოდებში არანაირ უკანონობაზე ხმა არ ამოუღია და მოქმედი ხელისუფლებანი არასოდეს უმხილებია, არცერთი დაჩაგრული და გაუბედურებული ადამიანისათვის ის არავის არ დაპირისპირებია, თუმცა ყოველთვის ყველაფერი შესანიშნავად იცოდა. ესაა ისტორიული მოცემულობა და რეალობა. წმ. ილია თეზბიტელის სახელს კი ატარებს, მაგრამ მისი ცხოვრება მეტად თუ ნაკლებად უსჯულო ხელისუფლებებთან მუდმივი კოჰაბიტაცია იყო, რითაც მდიდრდებოდა და ძალაუფლებას იზრდიდა, მაშინ როდესაც ილია თეზბიტელი მუდამ ამხელდა უსჯულო მეფე-დედოფლებს და მათ დიდებულებს, ამიტომაც თეზბიტელი მუდამ დევნილი იყო ხელისუფალთაგან, ილია მეორე კი მუდამ განდიდებული. ერთადერთი ხელისუფლება ვისაც ილია შიოლაშვილი ღიად დაუპირისპირდა, ეს იყო გამსახურდიას ერთწლიანი ეროვნული ანტისაბჭოთა ხელისუფლება, და აკი მალევე მოიშორა, პუტჩის ლიდერები აკურთხა, შეიტკბო და დაიმეგობრა უწმიდესად წოდებულმა შიოლაშვილმა. ეს იყო მისი ნამდვილი, რეალური მონაწილეობა ძმათა მკვლელი ომის გამჩაღებელთა სისხლიან პროცესებში და ზნეობრივი არნახული დაცემა ერის სულიერ მამად დადგენილი ილია მეორისა, რადგან მან მკვლელების მხარე დაიჭირა და ამით თავადაც მკვლელების სიაში ჩაენერა. მართალია, შევარდნაძის რეჟიმმა და წითელმა ინტელიგენციამ მისი რენომე დაიცვა და დიდებით შემოსა, მომდევნო ხელისუფლებებმაც ეს გზა აირჩიეს, ყველაფერი კეთდებოდა მისი განდიდების და კულტის შესაქმნელად, მაგრამ საბოლოოდ ისტორია აქ და მაღლა ღმერთი ყველაფერს შეაფასებს სიმართლით, მისი კულტი კი გაცამტვერდება თავის უნამუსო თუ უტვინო მეხოტბეებთან ერთად. ეკლესიაში

პიროვნების კულტის ადგილი არ არის!

ეკლესია უნდა ემსახუროს სიმართლესა და ზნეობას. არ შეიძლება ეკლესია იქცეს უზნეობისა და ფუფუნების ადგილად, არ შეიძლება დაჩლუნგებული მასები მამონას კერპს ეთაყვანებოდნენ. რელიგია ხალხის ოპიუმად კი არა, აზროვნების, გონიერების და სინდისის გაღვიძების წყაროდ უნდა ვაქციოთ!

ზოგი შიშობს, რომ მხილების გამო ეკლესია დაიცილება მრევლისაგან, მაგრამ სიცრუეში ჩაძირულ სავსე ტაძრებს ნახევრად ცარიელი სიმართლეში მყოფი ეკლესია სჯობს! სიმართლე და პატიოსნება ერთად, ესაა ღვთის დიდება და მადლი, ხოლო სიცრუე და ბიწიერება არის სატანის განდიდება! ტოტალური უსამართლობის და განუკითხაობის გამო ღვთის ტაძრებს ეშმაკები ეპატრონებიან. მონური მორჩილება და კვებითი მარხვა აქციეს ეკლესიურობის საზომად, არადა ამ ორივეს ძროხები უკეთესად იცავენ, ვიდრე ადამიანები, თუმცა ძროხები სასუფევლის მკვიდნი ვერ გახდებიან, ასეთია საეკლესიო სწავლება. სასუფევლის მკვიდრნი გახდებიან მოაზროვნე, სინდისის და ზნეობის სადარაჯოზე მდგომი ადამიანები, რადგან “ნეტარ იყვნენ სიმართლისათვის დევნილნი, რამეთუ მათი არს სასუფეველი ცათა!”.

დეკანოზი ილია ჭილაძე

საქართველოს საპატრიარქოს დიდი ბრიტანეთისა და ირლანდიის ეპარქიის მანჩესტერის ქართული სამრევლოს წინამძღვარი

29 მარტი, 2021 წელი

[მსოფლიო საეკლესიო სიახლენი](#)